

河濱遺書鈔

河濱遺書鈔卷三

朝坂李 楷叔則著 吳門沈 顥石天參訂

霧堂雜著

用九篇

大哉易乎大哉乾元之用九乎尼父曰乾元用九天下治也夫九者卦疇之所同也龍馬之圖爲生數洛書之文爲剋數其旨淵微不可更僕而用九用六則互相根也九之老陽變而爲陰其用九卽八六之老陰變而爲陽其用六卽七也何以明其然也乾之元坤之元二乎不二乎地不能外天以爲地地在天之中其爲體也一也七八者二少

之數也七之進而爲九九則盡盡則返八之退而爲六六則極極則變此三才萬物之總也是故九不遽六歷八與七而後得六六不遽九歷七與八而後得九聖人據其至者而言之故長夏而稱其節曰日短至嚴冬而稱日長至詎不以二氣之初各有倚任之隆爲歲功之分齊哉蓋於是而知用六之爲秋冬也用九之爲春夏也然而人於姤則數伏伏以三十爲之於復則數九九以九九爲之甚矣聖人之扶陽也一陽耳卽以老陽之義與之其在歷候之言羲和之驗自古及今未之有改也

冰篇

冰有厚薄乎曰無之初終皆薄也腹之堅其骨髓也有疆域乎曰無之地氣自北而南則寒沍均罡風自上而下則雪霜至然則有正變乎曰無之炎夏以極沸之湯投入井中則冰立成玄冬敲如玉之片煎于釜內則冰卽化然則冰水無之而寒于水如青出于藍而青于藍謂之一不可謂之二不可矣山之冰乃傲溪之冰曰予之族強盛而居于隄視庸流在車馬之下烟火之中淩陰之內鑿沖之餘者迴矣溪之冰啞然而笑曰若與我何以殊哉若幸而爲山冰山可以常冰乎若不幸而爲冰山山可崩亦可伐也吾不忍見若之升亦不忍擠若而傾之若之于我賓客耳

戚友耳若以我爲不如若夫見覲之消消若必先于我若
退而返初服與我混矣鳥之飛也四方惟所之而翺翺無
極也其倦也林矣人之生也萬事無不爲而皇皇日以騁
也死則歸于土而已矣以若之偶凝于山也而笑予傲予
予則林與土也吾爲若之先覺而若反相驕穉哉山冰曰
凝而結之且與我同質纈而文之又與我同華吾兩者竊
相讐矣乘時者以上位爲榮鳩衆者以黨與爲雄溪之水
山冰之所妒也不溪之驕而誰驕乎且讐溪矣方將東約
泰岱之雲西檄太白之湫移書峨眉之天半集兵陰山之
深窵使吾同類以填溪而稱快豈徒驕之云云哉溪水曰

生而無用于世者盛衰之所不與也死而有繫于人者恩怨之所不及也吾與若同生於天地間無所于親也無所于憾也無彼我無是非也若淩我以自雄厲則厲矣我不如若天下之勝若者不知其幾千萬也夫相競則凶相忘則吉莊子不云乎魚相忘于江湖人相忘於道術夫何以若之冰山而棄予之冰壑乎于是天帝聞之使水伯勅解之其詞曰嗚呼朕在天位四時式序爾冰氏不安厥職私相誹諍朕不爾究其自今仰體消息盈虛之理各遂其生以支餘年溪臣善下賚之以祉山臣傲狠姑貸其罪欽哉欽哉

生三篇

老子云一生二二生三三故二之所生也合二于一而三已具矣一分爲二者陰陽也剛柔也天地也清濁也高下也玄黃也有無也合二于一者陰陽之太極也天地之太和也剛柔之純氣也清濁之混元也高下之中而玄黃之太素也有無之微妙而大道之會也且夫數至於三而圓亦至於三而盛兩儀有聖人爲三才自此而十百千萬億兆皆二生三之所推也姑于十之中言之二與三合而成五五者數之中也倍之則爲十五半而十全其一之得五而爲六者一六之水也二之得五而爲七者二七之火也

三之得五而爲八者三八之木也四之得五而爲九者四
九之金也予嘗思之一且無論二三成五四何以生倍二
爲四此四象之說也老易圖範蓋有同異之旨微而不可
判

此有缺文

邵子之皇極并列之爲四序列之爲十二十二者

三十四而爲之者也此河圖之衍而非洛書之疇也邵子
之數學元會運世如年統四時時統十二月予嘗有疑于
日之有三十矣其全三十者其半則十五又分而半之者
爲七八之間七有奇而八不足夫上弦下弦者天之月爲
全之半歷之月爲朔望之半半以此限制莫之過莫之不
及人人之所共知也卽以十五準于易

此有缺文

終不合此蓋

邵子圖書之外另一易也取之歷而不取之三易洪範者也嗚呼天地者父母也人世者子也此三者其大要矣父母于子已爲三矣而乾之震坎艮又有三象坤之巽離兌亦有三焉男女各三是謂六子此後之小乾坤而衆父母也易之六十四卦乾入坤入不得不分乾坤而下同于六子者後來之權將任之於六子而父母猶在不忍使之遽泯泯也泯泯則如太上皇之無位而太后之撤簾退宮矣其在參同契則去乾坤坎離而用六十四卦陽大陰符以每日朝暮用二卦其于人身乾爲首六位則六陽居上六陰不與然而巽耳離目艮鼻兌口則諸子之依依于父也坤

爲腹五臟六腑則肝木肺金脾胃二土象于戊己然而心
君之火蒸液灌輸腎部則兼有水火滋生榮衛如諸子之
戀戀於母也是其分不得不分而貴乎其分而能合也何
以故分而合合而分者一也一則生不一則死生則生生
而不已不已則綿綿而長生一身之道如此家國天下莫
不皆然夫世俗分炊析筋強之以同居而不能是亦公藝
之難學而封建之勢也夫封建同姓正也其父昆弟之邦
與爰及異姓亦所必立其諸甥舅之國與子而孫孫而雲
仍迨于外孫以女之故及之故大宗小宗之外立母族妻
族焉此九族之所以連局也吾于三子望其鼎立不願其

折足田產房舍必均而三子之能繼志述事者予惟恐其不均也幸而見孫男一孫女一以吾爲祖而以吾之子爲禰矣昔者王父分諸父田十八畝房數楹而止予之不能大箕裘也以父之賜賜吾子以王父所未行之格而作訓子孫其昌當以吾之學與之田產房舍幾何哉

生日篇

岸公曰生我者父母也孝之始終也有賤焉自謂也有錢焉哀而祝焉猶寅餞納日也有漸焉疾者以大漸爲危也有薦焉主人禮也有踐焉踐形者君子也凡人之生泄泄耳聖人愛日賢者敬日其次惜日咸蘄于不忝詩曰夙興

夜寐無忝爾所生此之謂也生之日天下之所同也生不
同日而莫不有生之日無貴賤無智愚無古今一也一故
同同者理也異者分也同者性也異者情也吾觀于生而
知天下之大齊焉是人之所以自受也是猶賈之售而賓
之醕也是添我籌而算者也然莫大于禮禮合則人不合
則獸左氏之所云畜老也可不畏諸然而臣之事君子之
事父外之事中有差別焉頌也禱也祝也賀也自堯以至
于後王一也華之封人其萬世無疆之昉乎膝之下陞之
下莫不皆然是孝忠之準也是治道之隆也詩曰明發不
寐有懷二人懷者愍辭也離之則懷懷雖不忘猶二之也

孔子曰予也有三年之愛于其父母乎三年者父母之懷
子也九我其備態也孩與啼異疴養與平康異而顛有戟
髯而顛有楚越而交有犇會不旣殊乎斑者衣乎甚矣生
之不慊于父母也或謂岸曰人之生父乾母坤生初生前
則天地之道也應之曰聖賢以天地爲父母唯君曰天子
下此罔敢僭濫也是故齊庶者父母其天地孝以爲本敬
以爲文父母之所俞鬼神之所嘏也率之而下則耳孫也
溯之而上則鼻祖也自古及今念生吉趨不生凶父爾母
爾雖高曾雖雲仍莊莊乎其事親也油油乎其事先也梅
梅乎其追遠也以忌日爲往以生日爲來此君子之道也

天下之通義也古人生日不爲樂故明神廟免羣臣之壽
麪非吝也達也唐宋之辟著爲節非爹也仁也夫上之所
行下之所式也昔人制禮莫尙于周公周公缺生日又莫
大于仲尼未聞杏壇之上三千弟子祝仲尼之生也雖然
江之南盈十則相遺餘或否庶幾適中而秦俗役役僕僕
歲以爲常貧者苦之士夫樂詬誅而爭其言曰生不拜壽
歿不奔喪以爲情之迂也臯以相責其殆太甚而多事哉
岸曰道也者生生之謂也有生于陽者有生于陰者陽不
皆生陰不皆斃其謂人以生而謂鬼死者陋哉生則慶死
則悲牛山之涕南面之樂抑又過焉是故孔子曰愛之欲

其生惡之欲其死人而爲天下之所愛莫若先自愛嗟乎
養生於生之日不若達生於未生之前

代訓

代有新故無優劣有去來無欣戚何以明之代者禪則善
爭則惡雖父之壽不得不與子雖堯之聖不能不與舜安
于其序無心于其間斯乃所謂善耳時未至而上故卸之
燕之子噲矣時未至而下故窺之燕之子之耳甚遠者羿
浞莽操之臣隋煬之爲子宋匡義之爲弟種種橫生余嘗
悲之然其事肇于古爲堯老而舜攝見于周爲成幼而旦
攝襲而爲之者漢以新攝魏以晉攝皆于異姓階亂其在

同姓而攝未有不危亡者也危及其社稷亡及其身累及于臣庶當其居攝之初詎期其後日之敗衄乃至于此哉今夫后妃之攝爲垂簾爲二聖則呂雉武嬰之屬永永龜鑑而相之竊威權將之列藩鎮其名不爲攝而殆有甚焉甚矣攝之不可爲也卽無神器之窺每有九錫之例羣小每從而慫恿之此則履霜堅冰之漸哉趙高以鹿馬愚二世宦官之禍豈不昭然漢隆準枕宦官股唐之高力士魚朝恩繼之矣不但已也朱明土木之變非王振汪直爲之乎劉瑾之後莫橫于肅寧肅寧魏上公與定興客奉聖比而亡明愚故曰攝以宦寺此昏桷之所以啓衅也薦紳之

所以流毒而四海之所以困窮也寺人之令所以見慮于秦風而勢星之所以點天垣也乃若士之程表公然以爲禁中頗牧而六師無不解體矣諛其上者且以爲五帝神聖其下莫能及矣嗚呼熹朝不足言也崇禎自信邸入繼清刑餘之巨憝伸天下之正氣亡何而大王公二王公陰見柄用外諱豎刁之名而實有仇士良之寵雖不至如天啓中有戶工二部之柄鹽漕軍門之威廠衛緝事大獄大毒之流行而帝日嗜殺戮各出納卒以謀播遷不就于煤山乎殂落惜哉悲哉餘風所煽江南淫酗有張監者不招搖而蚊蚋集矣台鉉樞輔漏未三更候者如織是其自宮